

Da Herr Vitek

Text: Tom Lackner

1. Da Hea Vitek foat an Meaz'l – ein superes Gefäat
Doch meist'ns scheidt a nua davua und schaut dabei vakkläat
Ea putzt eam und poliat eam en liab'm laungan Tog
Wöel a hoid so gean sei Schbiag'lbüd im Kühla aunschau'n mog

Dabei is jo da Hea Vitek ned wiaklich goa so schee
Sei Glotz'n is so nockad wia r a ausg'ramt's Poat Monnee
De Zähnt san a Ruine, und daunn hod a no a G'wicht
Wia ma's sunst nua in Schönbrunn bei de Nüüpfead drauß'n siecht

Doch indem, dass jetz' da Vitek eine Nob'lkutsche fäat
D'rüm glaubt a glei, dass ea jetz' zu de bessan Löete g'heat
Ea schimpft und föet, wia eam da Böhm en Paakplotz schdreidich mocht
Doch dea scheidgt g'miadlich aus, baut si auf vua eam und locht
Daunn sogt a:

Refr. Schau mi ned so deppad au

Du waaßt genau, i kau
So G'sichta ned vatrog'ng
Hau Di liaba üba'd Häisa
Glaubst, Du waast da Kaisa
Med Dein' dick'ng Wog'ng
Schau, dass D' fuatkummst, oba schön
Vagröe Di auf da r Schdöh
Sunst hüüf i da glei noch
Waunn i Dei schwindliches G'sicht nua dasiech
Mecht i aum liabst'n vua Loch'ng glei waana

2. Und im Schdia'nghaus, do hot da Vitek glei wieda r an Köch
Wöe aus da r Wohnung von da Pribil föet's ois wia r in ana Söch
De kocht fia iare Freind, dass Da Hea'n und Seh'n vageht
Nua bled, dass auf da r Gästelist'n ned da Vitek scheidt

Und do reißt en oaman Vitek hoid leida de Geduid
Und dass es Kuch'lfensta off'm is, is wiaklich ned sei Schuid
Ea bumpat, dass da Pribil-Bua vom Mittagsschlof aufwocht
De Pribil geht zum Kuch'lfensta, räispat si und locht
Und daunn sogt's:

Refr. Schau mi ned so deppad au

Du waaßt genau, i kau
Des G'schrah hoid ned vaputz'n
Schdöh Di doch in d' Gistabaun
Ois blada Sens'nmaunn
Do waast amoi von Nutz'n
Schau, dass D' Di vaböelisiast
Und unsichtboara wiast
Ois wia r a Ziakusfloh
Schleich Di, Du Giftzweag, sunst leicht i da haam
Und blos da de Liachta aus, dass D' nua mea schwoz siechst

3. So vüh Schlechtichkeit, do zuckad jo des liabste Vasa'l aus
No Gottseidaunk! De Tia foit zu, jetz' is da Vitek z'haus
Nua r ealeidet glei da Hausfried'n scho wieda r einen Bruch
Wöe des G'frast vo üba eam hod Musikant'n zu Besuch

Und mit einem flinken Satz is da Vitek a scho duat
Vagisst auf olle Föamlichkeit und pläat nua: „Auf a Wuat:
Wos büd'n sa se ein, se zuagekiffa Ignoarant?
Dea Störenfried laht in da Tia und auntwuatet: „Charmant!“
Daunn sogt a:

Refr. Schau mi ned so deppad au

Du waaßt genau, i kau
Cholerika ned leid'n
Dass d' Da söwa z'wieda bist
Vua lauta Frust nua frisst
Des siech i von da r Weid'n
Huach! I gib da no an Tipp
Kumm obe von Dei' Trip
Nimm's locka und geh ham
Bau da r an Of'm, und ziag amoi duach
Und ollas wiad auf amoi rundherum leichta

4. (I sog's:) De Nochba'n vom Hean Vitek san Vabrecha ollesaumt
Und darum san's jo duach sei Intervention scho aumtsbekannt
De Frau Inschbekta salutiat, wia si s' von Aumtsweg'ng so g'heat
Und daunn sogt's eam, dass' a jeda in da r Aumtsschtu'm deitlich heat
Sie sogt eam:

Refr. Schau'n S' mi ned so deppad au

Se wiss'n jo, i kau
Bein best'n Wühn nix moch'ng
Foan S' doch oh med dera G'schicht
Se Gift schbrixtada Wicht
Do kaunn i jo nua loch'ng
Waunn Sa se beschwea'n wo'in
Daunn tan S' ma doch an G'foi'n
Geh'n S' glei auf's Soizaumt hie
Dazöhn S' dena oiß, und de kümman si d'rüm
Sektion fia Berufsquerulanten! Nur bitte ...

Schau'ns mi ned so deppad au
Sunst schbea r i Sie in' Bau
Se Watsch'nmau